

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – prečišćeni tekst ("Službeni glasnik BiH", broj 63/16), na sjednici Državne regulatorne komisije za električnu energiju, održanoj 29. augusta 2018. godine, donijeta je

ODLUKA

O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Izdaje se licenca za obavljanje djelatnosti međunarodne trgovine električnom energijom Društvu sa ograničenom odgovornošću "G-Petrol" Sarajevo.
2. Licenca iz tačke 1. ove odluke izdaje se za period od 1. septembra 2018. godine do 31. augusta 2023. godine i koristi se u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16).
3. Ova odluka stupa na snagu danom donošenja, a izreka odluke bit će objavljena u "Službenom glasniku BiH" i službenim glasilima entiteta.

Obrazloženje

Društvo "G-Petrol" d.o.o. Sarajevo (u daljnjem tekstu: podnosilac zahtjeva) posjedovalo je privremenu licencu za obavljanje djelatnosti međunarodne trgovine električnom energijom, koja je bila upisana u Registar licenci kod ove Komisije pod registracijskim brojem: 05-28-12-136-18/16 od 21. jula 2016. godine, a čije je trajanje isteklo 31. jula 2018. godine.

Vlasnik ranije važeće licence nije iskoristio mogućnost obnove licence kako je to definirano članom 48. Pravilnika o licencama – prečišćeni tekst ("Službeni glasnik BiH", broj 63/16), odnosno propustio je da najkasnije 120 dana prije isteka važnosti posjedujuće licence, izrazi svoju namjeru da djelatnost međunarodne trgovine električnom energijom nastavi i dalje obavljati. Zahtjev za izdavanje nove licence DERK-u je dostavljen po isteku gore navedenog roka i to 13. jula 2018. godine i zaprimljen je pod brojem: 05-28-12-286-1/18, što je rezultiralo diskontinuitetom u posjedovanju licence tokom augusta 2018. godine. O podnijetom zahtjevu odlučivalo se u skladu sa pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u BiH ("Službeni glasnik BiH", br. 7/02, 13/03, 76/09 i 1/11).

Zahtjev je podniet na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su omogućili DERK-u da razumije, razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj: 05-28-12-286-2/18 od 26. jula 2018. godine.

Po pregledu i provjeri svih formalnih elemenata zahtjeva, DERK je najprije 30. jula 2018. godine objavio u dnevnim novinama i na svojoj internet stranici kratku obavijest za javnost, sumirajući zahtjev za licencu i odredio rok do 6. augusta 2018. godine za dostavljanje komentara javnosti na podnijeti zahtjev za izdavanje licence.

DERK je konstatirao da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da sudjeluje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom jer je tokom dvogodišnjeg perioda korištenja privremene licence permanentno potvrđivao svoje

tehničke, pravne i finansijske mogućnosti i pružao dokaze da ima osigurane resurse, organizirane uvjete i utvrđene profesionalne standarde da nastavi obavljati istu djelatnost.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima i kriterijima za obavljanje djelatnosti međunarodne trgovine električnom energijom dao je osnova DERK-u da pristupi izdavanju licence, odnosno pripremi Nacrta odluke o izdavanju licence za djelatnost međunarodne trgovine, koja bi važila pet godina i koja se koristi u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom.

Ovaj dokument je od 9. augusta 2018. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 14. augusta 2018. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako podnosilac zahtjeva ni u posljednjoj prilici do 23. augusta 2018. godine, po podnesku DERK-a broj: 05-28-12-286-14/18 od 16. augusta 2018. godine, nije isticao neslaganje sa bilo kojom odredbom Prijedloga odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Na osnovu svega naprijed izloženog, te respektirajući i dokaz da je podnosilac zahtjeva prethodno ishodio dozvolu Regulatorne komisije za energiju u Federaciji BiH za snabdijevanje električnom energijom – dozvolu II reda, sa rokom važenja do 14. marta 2023. godine, DERK je odlučio kao u izreci ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema ove odluke.

Broj: 05-28-12-286-16/18

29. augusta 2018. godine

Tuzla

Predsjedavajući Komisije

Milorad Tuševljak